

## 7. FEDU: Nagrade za najljepše neobjavljene bajke

Festival dječije umjetnosti FEDU završio je svoju ovogodišnju potragu za najljepšim neobjavljenim bajkama u kategorijama za odrasle autore iz Bosne i Hercegovine, Hrvatske, Srbije i Crne Gore te učenike osnovnih škola iz Bosne i Hercegovine.

Na konkurs / natječaj Festivala dječije umjetnosti FEDU za najljepše neobjavljene bajke pristiglo je 190 bajki – 63 odraslih autora i 127 dječjih.

Ocjenjivao ih je međunarodni žiri u kojem su poznati pisci za djecu i odrasle: Slavica Lončarić-Đugum iz Hrvatske, Draško Došljak iz Crne Gore te Šaban Šarenkapić, Aleksandra Čvorović i Lidija Pavlović-Grgić (predsjednica žirija) iz Bosne i Hercegovine.

Pred žirijem su se našle bajke afirmiranih književnika za djecu, pisaca koji će tek zasjati na spisateljskom nebu i učenika čija talentiranost udružena s maštovitošću puno obećava, a koliko je bilo autora, toliko je bilo i različitih bajkovitih kreacija. Čitali smo bajke inspirirane legendama, bajkovite tekstove s likovima i zapletima koji podsjećaju na klasična ostvarenja bajkopisanja, čudesne priče u kojima akteri iz biljnog i životinjskog svijeta progovaraju o dobru i zlu, bajke u čijem su središtu događaji smješteni u našu svakodnevicu (često prožetu teškim trenucima i u posljednje vrijeme opterećenu pandemijom koronavirusa), futurističke bajke koje prizivaju različita čuda tehnološkog napretka...

I ove godine žiri je imao pred sobom zahtjevan i odgovoran ali i divan zadatak – iz velikog mnoštva originalnih i kvalitetnih ostvarenja izdvojiti najbolja. Imajući na umu vještinu tkanja bajkovite priče, originalnost i svježinu nadahnuća i ideja te plemenitost poruka nenametljivo utkanih u književnu riječ, odabrali smo FEDU-ove laureate – odrasle, dobitnike nagrada „**Aidin Maslačak Bajka**“, i učenike, dobitnike nagrada „**Najbolje mlado spisateljsko pero Aida**“.

U kategoriji odraslih prvo mjesto pripalo je književnici **Tatjani Andrejević** (BiH) čija je bajka „Kukuriku“ inteligentno, maštovito, razigrano i duhovito kroz kljunove i usta domaćih životinja u jednom seoskom dvorištu ispričala veliku i važnu priču u kojoj sve kukuriče, mijauče, muče i guče o prijateljstvu i dobroti za koje se vrijedi žrtvovati do kraja. Drugonagrađeni **Mahir Rešidović** (BiH) vješto je ispisao poetičnu i poučnu bajku „Anđeoski plamen“ u čijem su središtu ljubav i životna borba jedne posebne djevojčice i njezinog oca koji nas poučavaju kako čistim srcem uvijek možemo osvijetliti put do rješavanja najvećih problema.

Trećenagrađena **Devla Aliustić** (BiH) napisala je zanimljivu bajku „Brzi“ o konjušaru i njegovim životinjskim prijateljima koji čovjeka mogu učiniti junakom najljepših bajkovitih i stvarnih zgoda.

Treba naglasiti da se u ovoj kategoriji iznimnom kvalitetom bajki istaknulo više autorica i autora među kojima su: Mehmed Đedović („Šta ti znaš sanjiva princezo“), Ranko Pavlović („Hrabri pastir i đavolov šegr“), Jagoda Iličić („Čarobni kolačić“), Dubravko Boban („Maštar“), Nermina Ahmetpahić („Čarobni izvor“) i Maja Ručević („Munjko i Pužikuća“).

Prvi bajkopisac među učenicima ove je godine **Bakir Selimović**, učenik 9. razreda Prve osnovne škole „Živinice“ (Živinice), čija „Bajka o jednoj neobičnoj ljubavi“ u čitatelju budi osjećaj divljenja prema prijateljstvu Smrti i jedne srne.

Druga nagrada pripala je **Nejri Beširović**, učenici 5. razreda Osnovne škole „Banovići Selo“ (Banovići Selo), za „Bajku o princezi i svicu“ koja oduševljava maštovitim zgodama kukaca na jednoj čarobnoj livadi.

Trećenagrađena **Ines Jelavić**, učenica 7. razreda Katoličkog školskog centra „Sveti Josip“ (Sarajevo), napisala je dojmljivu bajku „Čudesni susret“ koja miriše na plovidbu knjigama i ljubav jedne kćeri i njezine majke.

Budući da je na FEDU-ov konkurs / natječaj pristiglo i puno lijepih i originalnih bajki iz učeničkih pera koja zaslužuju pohvale za iskazanu darovitost, žiri je odlučio dodijeliti Pohvale za bajkopisanje ovim učenicima osnovnih škola:

1. Iris Ademović, „Ključ za maštu“; 8. razred, Katolički školski centar „Sveti Josip“ Sarajevo
2. Ajla Grebo, „Da li je sreća otišla“; 5. razred, Osnovna škola „Malta“ Sarajevo
3. Marta Herceg, „Plavooki“; 9. razred, Osnovna škola „Ivana Brlić Mažuranić“ Ljubuški
4. Ahmed Kamerić, „Drvo želja“; 5. razred, Osnovna škola „Malta“ Sarajevo
5. Ajra Branković, „Bajka o glazbenoj kutiji“; 6. razred, Katolički školski centar „Sveti Josip“ Sarajevo
6. Anisa Bašić, „Umorno stablo“; 8. razred, Osnovna škola „Kiseljak 2“ Zabrze
7. Petra Bošnjak, „Zimska čarolija“; 6. razred, Osnovna škola „Ivan Gundulić“ Mostar
8. Adrian Turudić, „Vitez Artur“; 6. razred, Katolički školski centar „Sveti Josip“ Sarajevo
9. Adna Bećirović, „Djevojčica Emma i suncokret“; 6. razred, Prva osnovna Montessori škola Zenica
10. Emin Agičić, „Čarobno drvo“; 4. razred, Prva sanska škola Sanski Most
11. Sarah Imamović, „Mrvica dobrica“; 8. razred, Osnovna škola „Tušanj“ Tuzla
12. Rijad Muhić, „Čuvar proplanka“; 6. razred, Treća osnovna škola Ilidža
13. Anđela Glavaš, „Čarobni san“; 7. razred, Osnovna škola „Antuna Branka i Stanislava Šimića“ Drinovci
14. Bekir Gutić, „Zli čarobnjak Covid“; 8. razred, Osnovna škola „Grivice“, Banovići
15. Toni Pavić, „Čarobna česma“; 4. razred, Katolički školski centar „Sveti Franjo“ Tuzla

Uz navedene nagrade i pohvale žiri je odlučio dodijeliti i posebnu diplomu „Otkriće Bajke“ za **Merjem Čopra**, gimnazijalku iz Sarajeva, koja je u svojim bajkama „Jedna značajna odluka“ i „Pismo budućoj sebi“ pokazala izniman dar bajkopisanja koji će zasigurno u budućnosti rasti i u profesionalnim književnim okvirima.

Na kraju je važno naglasiti kako je unatoč okolnostima pandemije koronavirusa bajka našla svoj put u svijet zahvaljujući trudu malenih i odraslih bajkopisaca koje pozivamo da i ubuduće budu dio FEDU-a, festivala kojem je cilj poticati, razvijati i podržavati talente najmlađih među nama.

*Lidija Pavlović-Grgić,*  
predsjednica FEDU-ova žirija za izbor najljepše neobjavljene bajke